



Social media policy per anuzadëures da dedora

La Provincia autonoma de Bulsan, damoinla ti dijons Provinzia, nfurmea la zitadines y i zitadins tres plataformes social desferentës y scialdi nuzedes y nveia la cumenanza a fé pea pra la descuscion sun chisc canai y a spartì y se giamië ora i cuntenuc.

Sun i profii social ufiziei dla Provinzia vëniel publicà tresora y do y do nfurmazions n con' dl'ativiteies y dla dezijions dla Jonta provinziela, y oradechël tesć y fotografies che à da n fé cun ntraunides, manifestazions y scumenciadives.

La Provinzia ie atualmënter prejënta sun chësta plataformes social: Facebook, Instagram, LinkedIn, X (ex Twitter) y YouTube.

- Facebook:
 - [Provincia Bolzano](#)
 - [Land Südtirol](#)
 - [Provincia Bulsan](#)
- Instagram:
 - [provincia.bolzano](#)
 - [land.suedtirol](#)
 - [provincia.bulsan](#)
- X (Twitter):
 - [Provincia Bolzano](#)
 - [Land Südtirol](#)
- LinkedIn:
 - [Provincia autonoma di Bolzano - Autonome Provinz Bozen](#)
- YouTube:
 - [Provincia Bolzano](#)
 - [Land Südtirol](#)
 - [Provincia Bulsan](#)

I aconc ufiziei cumpedei su tlo dessëura vën manejei dal'Agentura de stampa y comunicazion.

I cuntenuc publichei sun i social media dla Provinzia à mé carater nfurmatif. La comunicazion tres i social media ne à nia la valuta de na comunicazion leghela o ufiziela dla Jonta provinziela ala cumenanza.



Codesc de cumpurtamënt (netiquette)

La netiquette ti dà dant ai anuzadëures coche i à da nteragì sun i canai social dla Provinzia. La dà dant n valguna normes de cumpurtamënt che duc i anuzadëures muessa tenì ite.

La netiquette à si fundamënta tl respet reziproch: la Provinzia ie davierta al dialogh y ala minonghes desferëntes, ma ne lascia nia pro che l ti vënie frit permez dut ncrëusc y zënza maniera. Dutes y duc vën nviei a schivé na rujeneda da se n avëi mpermel a livel persunel, che pruvochée y che sibe ufensciva, a respeté i autri anuzadëures y de tenì cont di prinzijs fundamentei azetei dala sozietà. Razism, xenofobia, descriminazions che à si fundamënta tla religion, tla ravises etniques, tl gënder, tl urientamënt sessuel y nsci inant ne vën nia tulerei. L ne vën nia azetà che l vënie izenà ala viulënza. I cuntenuc publichei ne daussa nia jì contra i dërc de terzi, la privacy y la sfera persunela di ndividuums. L ne vën nia lascià pro retlam o spam che unirà riesc tëuc y tres.

N generel muessa l dialogh sun i social media unì caraterisà da:

- + na maniera de comuniché cun respet
- + ntervënc costrutifs de cuntenut che à da n fé cun la tematica
- + respet y nteres per la minonga di autri
- + argumentazions tleres che feje referimënt ala minonga de chiche scrij

Dal'otra pert ne daussa l dialogh nia avëi laite:

- ufendudes, calunies y pruvocazions
- repetizions de tesć medemi y de link (spam)
- che n uebe jì demez dala tematica che vën iusta trateda tla descuscion per se dé ju cun d'otra tematiches
- cumentares sarcastics y ironics, che ie suvënz funtana de melntendudes o nterpretazions fauzes.

La finamira prinzipela ie chëla de avëi n tlima online positif, che sibe dut ntëur nfurmatif y che respetée la cumenanza y i anuzadëures di canai social dla Provinzia Autonoma de Bulsan.



1.2 Conseguënzes de anuzamënt fauz

L'Agentura de stampa y comunicazioni ie responsabla dl manejamënt di canai social dla Provinzia y te chësta si ncëria muderéiela i comentares y la descusions, se resservan te uni mumënt l dërt de:

- ne respuender nia a cumentares nia sun misura
- tò y tres cumentares nia sun misura y ufenscifs
- fermé o tò y tres i profii di anuzadëures che va for inò contra l codesc de cumpurtamënt (netiquette)
- mustré su y comuniché viulazions pesoces de viers dl codesc de cumpurtamënt sun i social media.

Tl cajo de cumpurtamënc scialdi griefs se resservéiun nce l dërt de mëter a jì azions legheles.

1.3 Scunanza di dac

Ai account social dla Provinzia se làscel jì permez dala plata internet www.provincia.bz.it tres cunliamënc ipertestuei prejënc tl header y tl footer dla plata internet.

Per scuné la privacy di utënc ne tol i cunliamënc ai canai social prejënc sun la plates internet dla Provinzia nia ite cookies de terza pertes. Mé sce n fej n click atif sun l cunliamënt ipertestuel ven l anuzadëur inò adressà ala plataforma social dedora, ulache l muessa dé dant si preferënza n con' de cookies relatives ala plataforma social nstëssa, de chëla che la Provinzia ne n'ie nia responsabla.

Uni social network à defati na si politica de manejamënt di dac persunei, che se lascia cunsulté tla sezion "Privacy" dla plataforma social singula.